

COMUNICADO DI PRENSA: E areglo nobo ta haci e pensioen mas sostenibel y miho pagabel



"Cu e areglo di pensioen nobo aki a logra pone un stap importante den direccion di un pensioen sostenibel y pagabel", segun sra. Sheila van Veen, gerente general di Fundacion Fondo General di Pensioen Aruba (APFA), durante e reunion general di participante dia 15 di december den Cas di Cultura. E tabata positivo pa loke ta trata e acuerdo pa un areglo di pensioen nobo cera entre gobierno y e sindicatonan den e sector (semi) gubernamental. E acuerdo tabata tin como meta:

- Acopla e areglo di pensioen na e aumento di edad di AOV;
- Disminui e acumulacion di pensioen anual pa cumpli cu legislacion di pensioen nobo
- Reduci e gastonan di e areglo di pensioen pa haci esaki mas manehabel;
- Mehora e posicion financiero di APFA.

E reglamento di pensioen revisa, e Reglamento di Pensioen nobo 2014 (NPR 2014) ta drenta na vigor cu forza retroactivo entrante 1 di januari 2014.

Relato Financiero 2013

Teniendo na cuenta e desaroyonan mas reciente a duna mas tanto atencion na e areglo di pensioen nobo durante e reunion general di participante di APFA. Pero manera ta custumber a duna tambe atencion na e relato anual di e aña anterior esta 2013 durante e reunion anual cu e participantenan y pensionadonan. Sr. Sherwin Vingal, manager di finanza, a duna informacion tocante e cifranan di aña 2013.

Na 2013 e cantidad di participante a aumenta cu 3% te 10.625. E suma total di e capital di pensioen a aumenta di Afl. 2.083 miyon na 2012 te Afl. 2.236 miyon na 2013. E rendimiento total riba inversion tabata 5% na 2013 cual ta menos cu e rendimiento di 6,5% na 2012. Motibo pa esaki ta cu na 2013 e inversionnan den exterior tabata tin un rendimiento mas abou cu na 2012.

Ademas a conclui na final di 2013 cu mester reduci e interes actuarial pa e pensioennan cu no a wordo indexa. Consecuencia di esaki tabata cu e obligacionnan di pensioen a aumenta locual a ocasiona cu e grado di cobertura, cu ta duna e relacion entre e obligacionnan di pensioen y e capital di pensioen, a baha. Na final di 2013 e grado di cobertura bruto di NPR 2011 a baha door di esaki cu 2% te 80,8%. Na final di 2013 e grado di cobertura netto, den cual ta tene cuenta cu un reserva pa carga e efecto di posibel desaroyo negativo, tabata 75,5%. Na 2013 e prima total tabata 36,1% di e salario, di cual mas of menos un tercer parti tabata pa cubri e recuperacion di e posicion financiero di e fondo.

E areglo di NPR 2005 cu ta aplicabel pa 314 participante, tabata tin un grado di cobertura netto di 104,9% (112,2% bruto) na final di 2013. E grado di cobertura di NPR 2005 ta saludabel y ta cumpli cu e exigencianan di Banco Central di Aruba (CBA). E prima total di NPR 2005 tabata 27,8% di e base di pensioen (salario menos e franchise), cual ta 18% di e salario.

Grado di cobertura bruto ta yega 100%

Door di e transicion pa e areglo nobo di pensioen NPR 2014, e posicion financiero lo mehora considerablemente. Esaki ta consecuencia di dos factor. Na prome lugar e aumento di e edad di pensioen, cual lo aumenta den diferente fase di 60 pa 65 aña. E fasanan aki ta bay hunto cu e aumento di edad di AOV na Aruba. Pa motibo cu lo paga e pensioen mas laat, e grado di cobertura lo subi. Fuera di esaki a palabra cu Pais Aruba y e demas dunadonan di trabou cu nan lo haci un solo pago adicional pa hiba e grado di cobertura di NPR 2014 na 100% bruto. Esaki ta nifica si cu e garantia cu Pais Aruba lo haci pago adicional den caso di deficit den futuro, ta caduca. Den caso di desaroyo financiero negativo den futuro, e dunadonan di trabou y e sindicatonan mester bay den consulta cu otro pa soluciona esaki. Den un caso extremo APFA por haya su mes obliga pa reduci e suma di pensioen di esnan cu ta ricibiendo esaki caba y e derecho di pensioen.

APFA ainda no ta cumpli cu e exigencianan di Banco Central di Aruba cu un grado di cobertura bruto di 100% (94% netto) di NPR 2014. E institucion aki ta exige un reserva pa por cubri posibel desaroyo financiero negativo den futuro. E maneho di inversion existente di APFA ta sali for di e punto di bista di un grado di cobertura bruto minimo di 107% (100% netto). Pa e motibo aki CBA ta exige un plan di recuperacion pa NPR 2014 cual lo keda vigente te na momento cu yega e grado di cobertura rekeri. Pa esaki CBA a stipula e fecha mas tarda di 1 di januari 2029. A base di e maneho cu lo wordo hiba, directiva di APFA tin e expectativa di alcanza e nivel aki mas prome cu e fecha indica.



E cambionan di mas importante

Senior consultant sr. Lennart van An del di Towers Watson a indica den su presentacion durante e reunion general di participante, e cambionan mas importante di NPR 2014 compara cu e areglo anterior. Banda di e aumento progresivo di e edad di pensioen, lo reduci e porcentahe di acumulacion (e porcentahe di e salario riba cual anualmente ta acumula pensioen) di 2,15% pa 1,75%. E franchise (e parti di e salario riba cual no tin acumulacion di pensioen pa motibo cu e participante lo ricibi tambe AOV) ta aumenta di Afl. 14.059 pa Afl. 17.616. E dos cambionan aki ta haci cu e participantenan lo acumula pa aña menos pensioen, pero como cu e edad di pensioen ta aumenta y door di esaki e añanan di participacion tambe ta aumenta di 34 pa 40, e participantenan lo yega mas of menos toch na e mesun suma di pensioen. Sr. van An del a ilustra esaki cu diferente calculacion. Dependiendo di e edad di e participante ta resulta un efecto negativo of positivo chikito entre e areglo anterior y e NPR 2014 pa loke ta trata e calculacion di pensioen. Fuera di esaki e pensioen segun NPR 2014 lo cuminsa na un edad di pensioen mas halto cu esun den e areglo anterior.

Door di cambio den e acumulacion di pensioen e prima por baha. Na 2013 e prima tabata ainda 36,1% di e salario. E prima pa e acumulacion anual di pensioen tabata mas of menos 24% y e prima di recuperacion tabata 12%. Pa 2014 e prima di recuperacion no ta necesario mas pasobra e grado di cobertura bruto ta bira 100%. E prima ta pa e motibo aki igual na e gastonan di acumulacion di pensioen anual y a stipula esaki na 17,7% di e salario. Esaki ta e prima di pensioen total cu e dunadonan di trabou y e participantenan ta paga hunto. E representantenan di e dunadonan di trabou y e participantenan ta stipula e contribucion di e participantenan den e gastonan di e areglo di pensioen.

Baha cu pensioen adelanta ta keda posibel

Sr. van An del a informa cu e introduccion di NPR 2014 no a conduci na cambio den e pensioennan vigente. E pensionadonan a mantene locual cu nan ta ricibiendo na pensioen. Tambe nan ta mantene nan duurtetoelag. Locual si a keda palabra ta cu e duurtetoelag lo no aumenta mas den futuro. E posibilidad pa baha cu pensioen adelanta ta keda posibel pero desde e edad di 60 aña. Den caso di pensioen adelanta esaki lo ta menos cu e pensioen cu lo a ricibi riba e edad di pensioen di AOV. Tambe a amplia e posibilidad pa diferente escohenca den e areglo di pensioen. Asina ta e caso cu e participantenan por scohe pa baha cu pensioen parcial desde 60 aña.

Indexacion ta bira un posibilidad

Door di hiba e grado di cobertura na e nivel di 100% bruto, e posicion financiero di APFA ta mehora considerablemente. Hopi cu tabata presente na e reunion general di participante tabata curioso pa sa si APFA lo bay indexa e pensioennan awor. E posibilidad cu awor APFA lo por cautelosamente cuminsa adapta e pensioennan na e gastonan creciente di costo di bida ta en berdad mas grandi. Sra. van Veen y sr. van An del a duna sinembargo claramente di conoce cu APFA den e añanan cu ta bin siguramente lo no ta den posicion pa compensa e inflacion completamente. Pa esaki e grado di cobertura ainda no ta suficientemente halto. Ademas ta keda asina cu mescos cu den e areglo di pensioen anterior, cu e indexacion di APFA no ta aplicabel riba e pensioennan bou di e Ordenansa di Pensioen di empleado publico (PVL prome cu 1 di januari 2011).

Desaroyo financiero 2014

E cifranan preliminarario di APFA na final di oktober ta indica un rendimiento riba su inversionnan di 5,0%. A base di e cifranan preliminarario tin indicacion cu e grado di cobertura di NPR 2014 lo yega 102% na final di 2014. Na 2015 APFA lo publica e cifranan definitivo pa 2014.

Pa mas informacion:

Bo por tuma contacto cu nos na e siguiente e-mail adres:
npr2014@apfaruba.org



Reserva e siguiente dia | Na tur participante y pensionado di APFA

Diasabra, 17 di januari 2015 - Mercado di Pensioen

Mas informacion lo sigui despues.